

永丰乡人行年录校定本

卷 上

清同治五年丙寅(一八六六) 一岁

六月廿八日子时，乡人生于江苏省淮安府山阳县南门更楼东寓庐。

乡人家自南宋时由慈溪迁上虞之永丰乡，遂为上虞人。传十九世，至乡人曾祖讳敦贤，字希斋，嘉道间历佐盐河幕，流寓江淮。希斋公九子，三讳鹤翔字翼云，江苏候补布政司理问，以廉能为大吏器异。道光廿二年，英人犯长江，以防海劳保知府衔。廿三年，以催漕获盗功保知州。历知泰兴、赣榆、高淳、江宁诸县事，终高邮州知州，是为乡人祖。翼云公二子，长讳树勋，字尧钦，江苏候补县丞，历署江宁县丞、海州州判、徐府经历、清河县丞，是为乡人父。配范淑人，山阳范咏春以煦长女，生子五，乡人次居三。尧钦公始定居淮安。按乡人先世无达者。据《上虞罗氏支分谱》，其上虞本支通朝籍者，惟八世名禄，恩贡生，历桃源、新繁、天长三县知县；十一世名康，嘉靖己酉举人，直隶武清县知县，敕授文林郎。至希斋公，以佐幕积俸，从事懋迁，而未尝以书商为业。溥仪《我的前半生》谓乡人出生旧式书商家庭，乃向壁之谈，殆以乡人好著书刊书，遂附会为此说，以荧视听歟？

乡人生，桐乡劳玉初乃宣与尧钦公有昆弟之盟，适游淮安，
甥于清静之会。时已有长姊宝璠，长兄璠璠、次兄振镛。

清同治六年丁卯(一八六七) 二岁

叔父仲宣公膺乡荐。仲宣公讳树棠，官终遂昌教谕。

清同治七年戊辰(一八六八) 三岁

乡人生而羸弱，冬始免乳。

清同治八年己巳(一八六九) 四岁

三月，长妹宝书生。后适山阳范氏，婿湘谷云，范太淑人犹子也。

乡人从长姊问字，至冬识字千馀。

尧钦公以纳粟捐得江苏县丞。

清同治九年庚午(一八七〇) 五岁

入塾，受《毛诗》。塾师李岷江导源，山阳拔贡生，尧钦公受业师也。

清同治十年辛未(一八七一) 六岁

受四子书。四月，次妹宝珊生。后适仪征汪氏。

清同治十一年壬申(一八七二) 七岁

病项间腺肿，读书即发。虽受《尚书》，师第令默坐暗诵，成熟后背诵之，以完日课。师为诸兄讲授，旁听，遂渐解文义。师讲“先祖匪人，胡宁忍予”句毕，谓古人质朴，若今直斥先祖非人，则不可矣。乡人起质疑，师曰：汝谓当作何解？曰：此恐与“母也天只，不谅人只”句意通，言先祖亦人耳，人莫慈于祖父，胡忍见子孙苦厄而不之恤乎？师大惊异曰：诗意诚如是，不意予尚昧而汝已明。特召尧钦公告之曰：此子异日必以学术名当世。一日师讲“具曰予圣，谁知乌之雌雄”句，谓人皆自谓圣，然孰圣孰否，亦如乌之雌雄莫辨。乡人质之曰：胡独以乌为喻？师曰：汝意云何？曰：鸟兽雌雄，往往于其毛色知之，如鸡兔，惟乌则雌雄毛色不异，无从遽别，犹人之圣否，无从一见而判也。师抚乡人首曰：此足以启予。师虑其慧而不寿，谓尧钦公曰：此子若得永年，异日成就必远大。祖母方太淑人亦器异之逾他孙。

十月，三妹宝泉生。后适宛平王氏。

清同治十二年癸酉(一八七三) 八岁

虽授《易》，仍以病，终日坐书塾默诵。

方太淑人治家严，子弟无故不许出塾门。端午节，李师偶携乡人入市，乍见工人锻铁，怪问：赤者何物？师告之。仲宣公遂以“铁打铁”三字命对，乡人应声曰“柯伐柯”。仲宣公疑非已出，更命对，应曰“人治人”。

是年，尧钦公赴涟水县折狱。

清同治十三年甲戌(一八七四) 九岁

医治腺肿，多投凉剂，遂病喉，月必数发。师命理已授书，不复授他经，且告尧钦公曰：“此子不虑学不成，虑体弱。授书非所急。”

清光绪元年乙亥(一八七五) 十岁

六月，弟子经振常生。

清光绪三年丁丑(一八七七) 十二岁

十月，四妹宝全生。后适山阳李氏。

始读唐诗，尧钦公更畀以工部、剑南两集。

清光绪四年戊寅(一八七八) 十三岁

毕读《易》《诗》《书》三经 初学为诗文及小论。

清光绪六年庚辰(一八八〇) 十五岁

读《礼记》《春秋》。

五妹生。

初学制印，苦无师承，以百钱从持竿售旧物者得汉人私印一，佩衣带间，为有印癖之始。

清光绪七年辛巳(一八八一) 十六岁

始学为制艺。三月，尧钦公送乡人长次两兄返里应童子试，命偕往，时八比甫成半篇。至杭，寓板儿巷邵家店。乡人途次病喉甚剧，水浆不能下咽者十九日，几误试期，会值孝贞皇后丧，展试期至五月，遂得留杭医疗，病愈就试。正场首题《皆为庶人，庶人不传质为臣》，次题《何谓尚志》，诗题《松花满碗试新茶得新字五言八韵》，经古场题《卢橘夏熟赋》，诗题《风摇杂树管弦声得声字五言八韵》。榜发，乡人入县学第七名，伯兄佩南振 銛第廿四名。学使太和张霁亭 溧卿得乡人经古卷，欲置第一，寻疑童试不应有此，拆弥封，见年十六，益疑之，正场提堂面试，并出赋卷令讲解，无误，疑始释。因勉之曰：“予历试诸郡，未见才秀如子者。然子年尚幼，归家多读书，以期远到，不必亟科名。”在杭，偕仁和王同伯同谒郡庠，观宋高宗书石经，于堂壁见阮文达元所摹天一阁本石鼓文，手墨一本。游西湖，摩挲诸山题刻，流连不忍去，求墨本于坊肆，不可得。为平生癖金石铭刻之始。又于旅舍见桐城吴康甫廷康，年八十馀，长髯修干，藏专最富。索所著书，尚无印本，惟以古琴拓本四纸贻乡人。在郡城醉经堂书肆，遇马程汪谢城曰 桢。谢城，浙西耆宿，博学洽闻，能诗，精畴人术，时方为会稽教谕。李慈铭、杨岷皆重之。谢城丰体 頽颜，不鄙乡人年幼，呼与谈学，一语契合，奖借备至，且手所辑《荔墙丛刻》为赠。是冬谢城卒官，年正七十。按乡人于前辈学人中最推服谢城。光绪末，中朝议奖宿学，乡人首举谢城，谓虽已故，亦应奖。后惟奖生存者王 闾运、曹元弼三数人，汪不预。又乡人及见前辈学人中，尚有宝应成芙卿孺，不知在何年，附识于此。北归，萧山单棣华恩溥，尧钦公挚友也，附舟至姑苏，日与尧钦公谈艺。尧钦公忽问乡人，汝读杜陆两集，所最服膺之句为何？乡人举杜“致君

尧舜上，再使风俗淳”，陆“外物不移方是学”对。棣华遽执乡人手，贺尧钦公曰：此子异日，未可以儒生限之。寂寞人寰，何意得此小友！乡人因以所集陆句“外物不移方是学，百家屏尽独穷经”乞作楹帖，棣华欣然命笔。乡人好读剑南诗，自号陆庵，应在是年前后。既返淮，尧钦公得藩司檄，委署江宁县丞。遂往就职，兼为避债计，命乡人佐范太淑人主家政。乡人平日足不逾书塾，罕接外人，至是受事，惶骇汗出，见司田租者如接大宾，几不知措词。久乃相习。

十月，弟振奎生。

季冬，乡人长次两兄完婚，拮据将事。除夕祀先，萧然无办，范太淑人命乡人奔走称贷，得钱四千，始得卒岁。

清光绪八年壬午(一八八二) 十七岁

秋，与长兄佩南同应乡试，报罢。纾道江宁省尧钦公。于书肆见粤刻《皇清经解》，尧钦公以钱三十千购以畀之，如获异宝。后遂以一岁，读之三周。归途经扬州，于书肆得仪征张氏榕园藏石拓本十馀纸，皆出广陵者，为储藏墓志拓本之始。

本年，始治经史考订之学，以馀力及金石文字。家无藏碑，从山东碑贾刘金科赁碑读之，一碑钱二十。校勘《金石萃编》，凡讹文误字，悉为举正，碑字漫漶可辨而《萃编》失录者，亦为补书。五阅月，凡校七百馀碑。

清光绪九年癸未(一八八三) 十八岁

八月，弟振奎殇。

冬，始识塾屋路山夫。山夫翰苑世家，祖润生德又以制艺名于时。山夫以荫子得官，历宰繁剧，勤于吏事，顾以悻直被劾。

去。流寓淮安，筑屋于郡城东北隅，以在边高士寿民苇间书屋之西，遂颜曰“苇西草堂”。至是，与乡人纵谈金石考订之学，相得甚。山夫年长以倍，折节订忘年交。

乡人自去年始，率日厘家事，抵暮读书，鸡鸣就寝。夏间遂得不寐疾，羸瘠日甚。

弟子经年七岁，时无力延师，议至十岁遣学贾。乡人以其资稟可惜，罢学贾议而亲授之。

本年，淮安钦工镇耕者发古冢，中出器物。乡人辗转购得古镜一，遂为平生搜集文物之始。

本年，尧钦公从事金陵水利局工程。

清光绪十年甲申(一八八四) 十九岁

春，不寐疾渐愈。

四月，娶于范，连平范振之玉麟长女，长乡人一岁。范原籍粤东，流寓淮安。

方太淑人自仲宣公遂安任所返淮，尧钦公往迎，暂住白下。

本年，记校碑所得为《读碑小笺》，又取小小考订为《存拙斋札疏》。范淑人脱簪珥刻之，为乡人著书之始。后德清俞曲园樵采《札疏》语入所著《茶香室丛钞》中。俞当世经师，海内遂亦疑乡人为老宿，而不知时未冠也。

清光绪十一年乙酉(一八八五) 二十岁

十月十二日，长子福成生。

是冬，以上元水灾，尧钦公奉差办四乡振恤，驻湖熟镇之昭文书院，即阮氏文选楼旧址。

乡人长兄佩南常言士处贫贱，当自奋发，故颇肆力制举之

学。二十外始留意训诂名物，以为读书必先识字，识字以辨别正字、别字为要，辨别正字、别字以熟读《说文》及多见唐以前碑版为要，遂与乡人共赁碑读之。分居东西屋，每入夜，灯火荧然，伸纸疾读，煤染于手，十指尽黑，摩挲倦眼，则面目亦黧然。两人相顾绝倒，以为此乐非他人所能喻，而平日之愁虑抑郁，不觉其若失也。久之成《碑别字》五卷，乡人为序之。乡人亦成《金石萃编校记》《寰宇访碑录校议》各一卷。按《校议》后改名《刊缪》，附刊于《行素草堂金石丛书》本孙书之后。

本年，长兄佩南应乡试，复报罢。

淮入秋苦雨，禾稼不登，斗米千馀钱。路山夫出所藏旧拓《八关斋会报德记》易米，乡人素习颜书，于颜碑多得善本，尚阙此，亟以白粳五石易之。自记：“夜起展观，鸡鸣与风雨声都不复闻，而老友亦得三月饱食，忻快何如？”

八月，长兄佩南病歿，年廿四。时贫甚，无以为殓，范淑人出金饰易六万钱，乃得襄事。无子，以乡人长子福成嗣之，范太淑人命也。

本年，尧钦公摄淮安府榷务篆。

本年，撰《毛诗草木鸟兽虫鱼疏新校正》二卷。

清光绪十三年丁亥(一八八七)	二十二岁
清光绪十二年丙戌(一八八六)	二十一岁

四月，汪梅村士铎为作《存拙斋札疏跋》，曰：罗君坚白以所著《存拙斋札疏》属予雠正，且丐为之序。予拭老眼读之，其书不盈一卷，而考证极多精核。如证《论语》“温故而知新”，温即蕴字；《礼记·中庸》“素隐行怪”，《汉书》引作素隐，乃素索古字通

用；《老子》“夫佳兵者不祥之器”，夫佳之佳乃惟字，非从人从圭之佳；均确然不刊，古人复生，亦无以易其说。此外若四乳、木冰、石文成字、廿四月产子诸条，并资多闻。君食贫笃行，敏于著述，年裁弱冠，斐然有成，后来之彦，非君莫属。予暮齿养徐，目眊意倦，炳烛之明，仰惭前哲。责以作序，实难俞命，然厚意不可辞，爰揽素为跋，并审正其讹字而归稿于君。按梅村作此跋时，目眊已不能书，口授他人书之。

自乡人长兄逝后，家计益穷，一门之内，惨戚无欢。方太淑人深以株守为非计，戒乡人宜弃产之半以还急债，俾尔得负米四方，乃可复兴门祚。乡人谨受教，维时米价贱，一石才二千钱，田不易售。乡人乃质衣物得千钱，至江宁谋之尧钦公。尧钦公曰：“今谋食者多于牛毛，有仍岁处谒舍而不得者。尔贸然来，冀以旦暮遇之耶！”闻而喑然若丧，留三日归。时乡人薄有文誉，常为人捉刀作书院课卷，为校阅者崇实书院山长南丰刘慈民庠所知，刘老且病，遂请乡人代阅，割俸为酬。乡人勉应之，为阅卷年馀而却其酬。

夏，尧钦公受理江宁清节堂事务。秋末，署海州州判。

本年乡人撰《俗说》、辑皇甫谧《高士传》各一卷。

清光绪十四年戊子（一八八八） 二十三岁

乡人自习训诂之学，不复 **醵** 制举。尧钦公信日者言，谓当得科第，官京朝，令从山阳杜宾谷秉寅受学。家事旁午，两月才作三艺。其《肫肫其仁》一艺，宾谷甚赞许，惟谓不合制艺作法。乡人始悟中式之难，盖科名得丧，全操之于人也。

是秋，勉应试，仍报罢。在杭见桐城吴氏藏砖百餘列肆求售，皆《慕陶轩碑录》中物也。归而病锁口牙痛，十九日不能进点水，疮自颈 **潰**，出脓碗许乃愈。至是遂绝迹棘 **闾**。

夏，长姊适山阳何氏卒。

本年始与山阳邱于蕃崧生订交，于蕃号菴庵。邱氏自清初以来，代有闻人，以政事文学名当世者，先后相望。于蕃时年方壮，先世有遗产足自贍，蒔花种竹于所居，日与朋俦研讨词章金石书画为娱乐，或招携为文酒之会。乡人得阮吾山葵生《风雅蒙求》稿，以示路山夫与于蕃。路、邱各作序跋，**醵**金刻行之。

清光绪十五年己丑(一八八九) 二十四岁

正月，长女孝则生。

夏，以所藏明仿宋庆元晁氏宝文堂本《具茨集》赠邱于蕃，《四库》未著录。

七月，汪梅村卒，年八十有八。

仲秋 校《陈书》。

清光绪十六年庚寅(一八九〇) 二十五岁

正月，馆山阳刘氏，岁脩二万钱，邱于蕃所荐也。本拟荐清河吴氏，修丰于刘。以吴在大兴，馆地太远，遂辞丰而就菴（据上尧钦公禀手迹，下凡禀尧钦公皆同）。

闰二月十一日，祖母方太淑人卒，年七十。

孟夏 订《陆庵仿秦汉篆刻润例》：“石章每字半元 象牙竹根黄杨倍价，极大极小倍价，边跋每五十字洋一元，劣石及文字不通不刻。”

夏，订正李氏《纪元编》，取诸史及他纪元专书，详加**讎**校，订正百数十处。别为《考异》一卷，至冬乃毕。按此最初稿。嗣后递有增订，至民国十四年乙丑（一九二五）始刊行。

九月，次子福同生，八日而殇。

本年，又撰《毛郑诗校议》一卷。

山阳丁柏丞松为作《陆庵校书图》，路山夫及山阳顾持白云臣、徐宾华嘉、成絜生、徐皆有题咏（图已佚）。

文有日本人著《和汉洋年契》《史略》跋。

清光绪十七年辛卯（一八九一） 二十六岁

秋，至海州省尧钦公。时州议续修志，刘慈民荐乡人任之。至则州牧邀饮，并集州绅商志例。会某某已有成议，惧外人染指，议故弗谐。尧钦公为言其故，遂托辞谢之。

仲秋，删厘累年文字为《面城精舍杂文甲编》一卷。又撰《眼学偶得》《干禄字书笺证》各一卷，梁陈北齐后周隋《五史校议》五卷。丐友作《赁碑图》，志与长兄佩南赁碑共读事，时长兄歿五年矣。作《图记》谓“记我鹄原之痛，且以志寒士为学之匪易也”（按图似未果作）。

本年，山东河患频仍，抚幕妄人主贾让不与河争地之策，放宽河身，至欲移海内振助之款助官购民地。乡人家居闻之而骇，谓今日河身已宽，再宽则漫溢之害无穷，乃著论千馀言驳之。丹徒刘渭清梦熊见而韪之，以寄其弟铁云鹗，时铁云方任鲁河下游提调，主王景攻沙去淤，与乡人说十合八九。铁云亦以所上《治河七说》寄乡人，附书言：群盲方竞，不意尚有明目如公者。尊论渊雅，吾文则如老嫗与小儿语，中用王景名，幕僚尚不知为何代人。于是罢购地议。东抚张勤果囑故籍上虞，闻而欲延乡人入幕，乡人以不能离家远游谢焉。

有李氏者，藏五代杨吴李涛妻志石，扬州濬漕渠所得，文字漫灭，而题署年月具存。乃移石至邱于蕃家，乡人与吴县蒋伯斧亲施毡墨。

是年六月，尧钦公赴州西房山镇勘命案，八月赴州东响水口

勘盗案。

文有《魏源磨耶墓志》《北齐刘懿墓志》跋。存诗有《延陵十字碑》五律《六月廿一日，与邱君 嵩庵同拜欧阳文忠生日于路山夫丈欧舫，联句纪事》五排《题海州园林寺》五律凡三首。

清光绪十八年壬辰(一八九二年) 二十七岁

正月，次女孝诚生。

三月、范淑人以蓐劳卒，淑人来归，值家中落，斥装佐饔餐，井臼洗濯刀匕乳哺，一身任之，无怨色。乡人夜读，淑人必为整书卷，理衾枕，己则侧坐缝纫。匝月不通一语，恐妨读也。淑人母颜苦节，弥留以母为托。淑人卒后，长男鞠于范太淑人，长次两女寄养外家。

冬，嫂清河王氏亦病瘵亡，冬末，与范淑人同殡于南郭外之五里松成子庄。

本年，乡人始治谱系目录之学。成《新唐书世系表考证》一卷、《艺文志校议》二卷（按两书未刊行。宣统初，乡人官学部，灌阳唐尚书景崇假去，尚书故，书未还瓿）。又撰《三国志证闻》三卷。清河王寿萱锡祺为刊《淮阴金石仅存录》一卷于《小方壶斋丛书》中，辛卯夏所辑也。寿萱跋曰：“罗君叔韞，上虞人也，旅居淮阴，嗜金石成癖，藏碑版千百通。念淮阴金石之散佚荡缺，口涎手胝，摹拓考证，正往史之失，补志乘之遗。必云抗衡阮仪征、翁大兴、王青浦、孙阳湖，所不敢知，然于金石可继张力臣、吴山夫”。吴兴施均甫补华从张勤果西征，得汉刘平国《治关城颂》《沙南侯获刻石》墨本，以寄乡人，属为考证。时篋中惟有裴岑《纪功铭》，至是备有西域三汉刻。

本年 文有《长兄佩南先生传略》、《小学钩沈续编序》、《黄庭经》《邱珍碑》《化度寺邕禅师塔铭》诸跋。存诗有《人月与成丈味

茶》《邱君菑庵集葦西草堂同人赋诗纪事，用高适〈人日寄杜拾遗诗〉韵》七古《悼亡》七绝六首《内子亡后百日赋》五律《十日朔》七绝《快雪时晴，顾持白丈招同徐丈宾华、路丈山夫、段丈笏林、邱君菑庵，饮味蔬草堂，以诗代柬，谨次原韵奉和》七律《顾竹侯文学和其尊人持白先生雪后招饮之作，录以见示，步韵奉和》七律《持白丈招饮之后七日，葦丈复招诸君子饮于欧舫，以诗见招，属步原韵》七律《内子既殁之三日，往省墓，奠之以诗》七绝《雪后见冰筋长至三尺馀者，诗以记之》七绝《闷坐书怀，呈邱君菑庵》五律《除夕守岁书感》七律《徐丈宾华用葦丈雪后招饮诗见惠，依韵奉和》七律《嘉平十九日，持白、笏林两丈、竹侯文学招同徐丈宾华、路丈山夫、邱君菑庵寿坡公生日于欧舫，即事有作》五古，凡十八首。乡人痛失贤俚，形影益孤，每每寄之篇什，而嚶鸣求友，亦时有盍簪之乐。

清光绪十九年癸巳（一八九三） 二十八岁

春，送弟子经赴绍兴应试。于郡绅徐仲凡树兰座上识李越缦慈铭。越缦越中名宿，时方官御史，乞假返里，相与论学有契。郡中议修志，越缦拟投劾归主其事，并约乡人为助。明年十一月廿四日越缦遽卒于京师，年六十有六，约不克践。又识沈霞西处士复黎族孙锡卿延祚，锡卿出霞西《鸣野山房汇刻帖目》稿索为序。归舟无事，作《孔子弟子题名碑考》。

夏，撰《补寰宇访碑录刊缪》一卷（按此书后附刊于《行素草堂金石丛书》本赵书之后）、《再续寰宇访碑录》二卷。校定长兄佩南遗著《碑别字》五卷。

秋，从山阳丁氏假观所藏元移相哥大王印（移相哥大王见《元史·宗室世表》）

本年，馆山阳邱氏（按邱氏即邱于蕃）。溥仪《我的前半生》

掇拾谰言，谓乡人早岁教书于江西巨绅邱姓家，其家有百数十卷唐人写经，及五百多件唐宋元明字画，后皆为乡人席卷以去，因以发家云云。既误山阳为江西，邱为山阳著姓，至于蕃仍世儒素，而非巨绅。最奇者，唐人写经藏于甘肃敦煌千佛洞，光绪廿六年始被发现，尚不为国人所知，至卅三年首遭英人斯坦因盗劫，次年又被盗于法人伯希和。前此未闻有大批唐人写经传世。歿于光绪卅一年之邱于蕃，于被盗劫之前十三年，已藏有百数十卷唐人写经，岂不骇人听闻耶？盖乡人晚侍溥仪，素不嫌于溥之师保左右。时溥方藉宫中宝藏质押以维持其宫廷生活，彼辈任经纪，沾润自肥，恐乡人染指，百计 萋菲，且不惜为此含沙之射。溥遂深信不疑。然此只足以诋溥，而不足诋稍有识人也。语云，“讹言不实，流为丹青”，此类是矣。

文有《龙龕手鑑》《隳敬碑》《广清凉传》诸跋。存诗有《入日，持白丈邀为诗社焚尾之饮，以诗代柬，次韵奉和》五古《独坐》五绝《笏林丈闻予将返浙，用坡公送王颐赴建州钱监诗韵，赋诗赠行，次韵奉谢，即以留别》七古《雨夜》七绝《至苇西草堂看梅花，时已为风雨所败，慨然书此》七绝《舟中喜晴》七绝《西陵》七绝《晚次柯桥驿》五律《抵家书感》五律《刘忠介公海天旭日砚歌，忠介十一世孙海门秀才征题》七古，凡十首。

清光绪二十年甲午(一八九四) 二十九岁

夏，范太淑人病疟，转时症，乡人昼夜侍疾。半月后，疾益笃，医不肯处方，计无复之，乃 刮臂肉煎以进，疾竟得 瘳。

五妹病伤寒卒，年十五。

孟秋二日，叔父仲宣公卒于杭州客舍。

冬，移馆丹徒刘氏，授渭清、铁云诸子读，岁脩增至八万钱。

尧钦公署徐州府经历。

本年日韩交涉起，我军援韩。乡人究心时事，日陈海陆地图观之，以为大兵云集山海关，以拱卫京师，而沿海兵备虚，窃虑日本避实捣虚，先袭海军，则全局败矣。闻者皆笑为妄。惟刘铁云以为然。铁云负才不羁，治河有能名，时方丁忧在淮。日本果由金复海盖进兵，我海军 燬焉，于是笑者又推为先识。

丹徒刘氏为刻《碑别字》。

文有《新出北宋石经礼记中庸残石跋》。存诗有《题笏林秋林习隐图》七绝四首《阎百诗徵君生日，路山夫丈邀诸君子致祭新城祠庙 绘图纪事 属题》五古，凡五首。

清光绪二十一年乙未(一八九五) 三十岁

夏初，续娶于丁。丁，山阳大河卫籍，其先蒙古人。考荀，字嗣龙，廪贡生，老儒也。时长次二女寄养外家，至是携次女归。

乡人频年藉馆谷贍家，宿逋未能清偿。至是，以割产纾急难请于范太淑人，太淑人许焉。乃售泾河岸薄田百亩，得千馀缗，复割越河腴田百亩，质于吴县蒋氏，贷钱二千，以偿宿逋之尤急者。

时国威新挫，海内震叠。乡人亦欲稍知外事，乃从友人借江南制造局译籍读之，以为西人学术未始不可资中学之助。稟尧钦公：邑中拟开西学书院，教算学、舆地、时务、外国语四科。聘刘渭清授算学、外文，乡人授舆地，时务，以无从筹费而止。仅设一算学义塾。时乡人颇主设学堂，致书越中友人徐以愁、维则、蔡鹤颐、顾元培，请谋之当道，当道亦 赴之，将集事。乡人又以为国人安于固陋，人才日衰，皆由于不立学堂之故，今处处有兴学之议，又奏办津汉铁路，许民间开矿，皆时事有转机之象。

乡人素无钱币之嗜。蒋伯斧尊人敬臣清翊罢宰武义，卜居淮安，与胡石查义赞交，故藏泉颇富，鬻泉尤多精品，本年乡人得

纵观于所居抱布新筑而羨之，遂亦稍事搜集。

诸城尹祝年彭寿寄所刻福山王文敏懿荣《汉石存目》附书言：文敏将继是为《六朝石存目》，又将为《唐石存目》，繁赜非旦夕可就。乡人初校孙赵两《访碑录》，苦其多不胜数，欲断代为之，得文敏书，喜其与己意合（按此书与尹所著《魏晋石存目》，后乡人皆为补订，刊入《雪堂丛刻》）。

本年，续辑辛卯以后所作文字，为《面城精舍杂文乙编》一卷。文有《唐福州神树刻字》《史道畅造象记》跋。存诗有《感事，步邱菴庵韵二首》。按自辛卯至是，凡五年，存诗三十八首，写为《陆庵馀事》一卷，乡人弟子经藏之。题后曰：“右辛壬癸甲乙五年古近体卅馀首，叔兄年廿六至卅之作也。忆《感事步邱菴庵韵二首》，予亦同和。兄于诗喜陆剑南，然自谓所作不工，弃其稿，予拾而藏之卅馀年。顷搜集遗稿，出之篋中，重读一过，曷禁法然。时庚辰六月十六日，弟常谨志。”

清光绪二十二年丙申（一八九六年） 三十一岁

中日战役之后，国瘠民贫，乡人念农为邦本，古人不仕则农，于是有学稼之志。既服习《齐民要术》《农政全书》《授时通考》诸书，又读西法农书译本，谓新法可增收获，恨其言不详。本年春，乃与蒋伯斧协商，于上海创学农社，购欧美日本农书，移译以资考究。至沪后，设农报馆，聘译人译书及杂志，自任笔削，伯斧总庶务。

三月，序尹祝年《汉隶辨体》。

五月七日，三子福荃生。

六月十九日，禀尧钦公，谓浙省徐宗师致祥为守旧派翘楚，儿如春间就试，必遭斥。

廿六日，长女许配丹徒刘氏，婿铁云第四子大绅。大绅字季

纓，从乡人受业者也。

公车上书后，沪上志士鳞萃，学社报馆林立，时推钱塘汪穉卿康年所创《时务报》为翘楚，聘新会梁任公启超任撰述，日以瓜分之说激励人心，启民智，伸民权。乡人稟尧钦公，谓穉卿与儿旧交，《时务报》切中时弊，留心时事者不可不读。然亦虑当时号称志士者率浮华少实，异日为祸为福，未可逆知。志士过沪者，无不署名农社，乡人顾黯然独立，不轻与竞逐也。

本年编《再续寰宇访碑录》。段笏林得宋淳熙扬州井阑残字拓本，以贻乡人，乡人跋其上，并订正阮文达《扬州续志》之误（拓本今存予所）。

清光绪二十三年丁酉(一八九七) 三十二岁

八月，跋《黔蜀种鸦片法》，斥时人拟广种植挽利权之说，以为种鸦片不如种桑之利厚。冀贤有司起而行之。

本年有与蒋伯斧联名致南通张季直书云：“前在沪上，得睹光仪，并聆雅教。农社经营方始，头绪纷如，刻下草拟章程，呈呈诲正。昨穉公述如皋龙研仙大令愿捐如皋河地若干亩入农会，刻尚未悉田亩数目及地之所在。已函询龙君，俟得复函，拟先从此处开垦，相厥土宜，再定试种物品。惟弟等于垦荒一事，未经阅历，且报馆事方草创，未得分身。除托朱闾翁就近照料外，似仍须有当行切实之人斟酌督率之。前述之叶君，刻在何处？如能得渠经理，实所翹企。尚求便中代询为叩。承允于常熟尚书前致意，请其提倡，率奉章程一册，可否加函寄去？又章程数册，乞代寄都中及外间诸同志，拜恳拜恳。杭省创设蚕政局，仿行西法，拟请教习而难其人。从前康税务司派出学习之宁波某君，踪迹何在？求先生代为一访，如能至杭教习，俾中国蚕业日有起色，收回利权，功德不细也。此系杭守林公迪臣所托，